

純
常
子
枝
語

純常子枝語卷八

萍鄉文廷式撰書

陳邱明碣石調幽蘭其彈琴每用右手無名指若宋以來琴譜則無有用此指者矣其所謂抑卽後世所謂猱上蹴取聲卽所謂帶起也其命七絃爲宮商角徵羽文武亦與後世以數記者不同

朱子琴律說云

文集卷六十六

七徽之左爲聲律之初氣後身

長聲和節緩故琴之取聲多在於此又云七絃既有散絃所取五聲之位又有按徽所取五聲之位二者錯綜相爲經緯其自上而下者皆自上絃遞降一等其自左

而右者則終始循環或先或後每至上絃之宮而一齊焉此言琴律至爲簡明俗工不察久矣

琴徽之徽白石道人歌曲作暉

江慎修律呂新論謂琴徽泛聲應先天八卦橫圖一徽內無聲之處乾也然則先天之乾爲無卦畫無方位處乎附會無理令人失笑其論四清聲不可去論陳暘樂書之疏率則可謂深有發明者也

朱子中和舊說序

文集七十五

曰人自嬰兒以至老死雖語

默動靜之不同然大體莫非已發特其未發者爲未嘗發耳按如此則人自嬰兒至老死竟無一刻得中之時

誠非天命謂性之理宜自變其說也又與湖南諸公論

中和第一書

文集卷六十四

云中庸未發已發之義前此認得

此心流行之體又因程子凡言心者皆指已發而言遂
目心爲已發性爲未發又云程子所謂凡言心者皆指
已發而言此乃指赤子之心而言按分心性固非卽言
心而歧赤子之心與此心而二之亦恐非乾坤易簡之
理也中庸首章說文集卷六十七曰天命之性渾然而已以其
體而言之則曰中以其用而言之則曰和竊謂此說得
之陳蘭甫師云東塾讀書記卷九發而皆中節則非常人所能
喜怒哀樂之未發則常人有之絕無元妙也愚意元妙

雖無然此未發對下文發言其發既中節而謂之和矣
則其未發而謂之中者抑豈常人所能哉且下文又重
釋中字固當有致力處也此節在必誠其意之後蓋喜
怒哀樂之未發云云必謂誠意之君子矣

莊子逍遙遊篇往見四子藐姑射之山釋文四子司馬
李云王倪齧缺被衣許由汾水徐扶云反郭方聞反案
汾水出太原今莊生寓言也司馬崔本作盆水唐道士
成元英作疏云馬彪將四子爲齧缺便未達於遠理劉
璋推汾水於射山更迷惑於近事劉璋之說釋文所無
不知其何所本也

此非漢之劉璋以理
度之當是唐人耳

元英疏模擬郭

注不甚稱引舊說然其名物訓詁有出釋文外者正當是六朝之舊義耳

皇朝通志云元朱宗文撰蒙古字韻自謂能通音譯實多不能脗合如陶宗儀輟耕錄載元國字以可侯字爲首而是書又依韻會以見經堅可爲首其字母已不相合按以同文韻統華梵合璧之例推之見爲嘎之齊齒音可侯二合當爲喀之合口音卽溪字字母也特次序稍易耳

吳曾能改齋漫錄卷五云袁州自國初時解額以十三人爲率仁宗時查拱之郎中知郡日因秋試進士以黃

華如散金爲詩題蓋取文選詩青條若總翠黃華如散金是也舉子多以秋景賦之惟六人不失詩意由是只解六人後遂爲額無名子嘲之曰誤認黃華作菊華按此吾郡宋時聞人所以轉不及唐之多實由解額減少故也然以偶不得題解遂致頓減過半之額則亦有司奉行不善之過耳

又卷一云取士至仁宗始有糊名考校之律雖號至公然尙未絕其弊其後袁州人李夷賓上言請別加謄錄因著爲令而後識認字畫之弊始絕然則試事易書之制始於李夷賓也今府志亦不載此事

范景仁東齋記事卷三云初舉人居鄉必以文卷投賢
先進自糊名後其禮寢衰賈許公爲御史中丞又奏罷
公卷而士子之禮都亡矣按此知糊名足以杜奔競景
仁以爲士子之禮亡其說非也

曾慥高齋漫錄云熙寧殿試改用策謂比詩賦有用不
知士人計較得失豈敢極言時政自取黜落是初入仕
已教之諂也按宋時對策尙有極言時政者曾慥已有
是言更無論明以後矣

柳耆香明姚虞嶺海輿圖作奇南木

嶺海輿圖南夷序云自決隄坊罔恤狐兔凡我虛實皆

了然已久往歲寶安之變

正德間佛朗機夷人始稱入貢突入東莞大肆劫掠

耳未遠杞人有憂正在叵測君子不可謂之迂也嗟乎禍亟於二百年之後而能慮之於二百年以前若姚澤山者亦可謂瞻言百里矣

漢書西域傳安息國有大馬爵師古注廣志曰大爵頸及膺身蹄似橐駝云云徐星伯補注引王懷祖先生說曰爵上亦有大字而今本脫之御覽漢紀通典引並作大馬大爵余謂駝鳥至今有之以其似馬類故謂之馬爵似不必加大字元劉郁西使記亦云駝鳥卽安息所產大馬爵也

皇朝文獻通考卷二百九十七云舊集東南又有萬老
高人物土產俱與呂宋相類按此卽麻六甲此以廣東
音譯之故轉爲萬老高矣

宋于廷尙書略說四岳一條云伯夷封許故曰許由史
記堯讓天下於許由本莊正傳曾咨四岳巽朕位之語

百家之言自有所出按此條甚精然宋人愛日齋叢鈔
不知巽卷五引樓陽叔云從來人說莊子盡是寓言卻

不曾深考如堯讓許由依舊是有此人蓋申呂許甫皆

四岳之後許由亦其一也以當時咨四岳觀之則堯有
讓四岳之事但周言不無過當鄱陽湯君錫亦云湯名師中

嘉定進士伯紀端明之
父與陽叔時相後先堯始讓四岳四岳舉舜乃讓舜

左傳曰夫許太岳之後杜注云堯四岳則太岳非許由
乎後人遂有洗耳之說以上二條是許由事爲依倣讓
四岳爲之宋人已見及此特未知許由之卽伯夷耳

古今姓氏書辨證卷三十八云風俗通漢有博勞吉善
相馬通志氏族略引作博子勞按廣韻云古有博勞疑

兩書各誤衍一字博勞卽伯樂之轉音蓋凡善相馬者
皆謂之伯樂猶善審音者皆謂之師曠善視者皆謂之

離朱矣
黃帝時有師曠晉平公時復有師曠黃帝時離朱見莊子孟子離婁之明以爲離朱

鄧名世古今姓氏書辨證明史著錄蓋當時館臣誤以

爲明人

荀子富國篇言明分使羣孫子兵法亦言分數明此儒家兵家富強之大義也荀子曰事強暴之國難使強暴之國事我易吾亦云然

荀子所言君主之國之定法也墨子大旨近民主矣

王制篇云聲則凡非雅聲者舉廢色則凡非舊文者舉息械用則凡非舊器者舉毀夫是之謂復古禮記王制凡執禁以齊衆一段略采其意又四海之內若一家一節卽禮記王制達其志通其欲一節之義汚池淵沼川澤謹其時禁一節卽禮記王制獺祭魚然後虞人入澤

梁一節之義惟序官一章則荀子多言周制而禮記王制篇兼取殷制蓋漢文博士習公羊家之舊義矣

儒效篇曰以從俗爲善以貨財爲寶以養生爲己至道是民德也楊注云養生爲己至道謂莊生之徒此言是也蓋老子之言道欲以治天下莊子之言道則獨善其身之意多故荀子謂之民德也此老莊之辨也

日知錄卷二十晉惠帝時廬江杜嵩作壬子春秋壬子元康二年賈后弑楊太后於金墉城之歲按嵩一作崧崧事見晉書儒林杜夷傳云惠帝時俗多浮僞著任子春秋以刺之又惠帝紀云南陽魯褒作錢神論廬江杜

嵩作任子春秋皆刺時之作隋書經籍志總集類有杜
崧任子春秋一卷疑此書譏以任入官者故史以爲刺
浮僞耳亭林誤爲壬子而強爲之說失之

大唐傳載至德元年三月方以侍御史文叔清爲宣諭
使許人納錢授官及明經出身此捐納職官舉貢之故
事也

宋釋德洪石門文字禪卷二十二布景堂記云宣和三
年秋萍鄉文益之還自大梁過湘上會余夜語及里中
奇豪而高侯尤其魁壘云云此吾鄉文姓之見於北宋
者此記亦可收入縣志也

宋王瓘北道刊誤志祥符縣祆神廟注云案西夷朝貢

錄康國有神祠名祆畢國有大祆祠說文胡神也唐官

有祆正一曰胡謂神爲祆關中謂天爲祆瀛州樂壽縣

亦有祆神廟唐長慶三年置本號天神

據此知祆字乃漢時譯人所造

舊經引漢書金人祭天事據霍去病獲休屠王祭天金

人如淳曰祭天以金人爲主

按說文無祆字徐鉉據玉篇附入耳此誤引

北史宣武靈皇后胡氏傳廢諸淫祀而胡天神不在其

列

四庫全書總目卷一百二十五子部雜家類西學凡提要引杜預注左傳次睢之社曰睢受酢東經陳留

梁譙彭城入泗此水次有祆神皆社祠之此祆廟之見於經典者

漢書郊祀志下雲陽有徑路神祠祭休屠王也師古曰

休屠匈奴王號也徑路神本匈奴之祠也按徑路神不知何謂蓋亦祆神之類

元迺賢河朔訪古記劉神川先生墓一條云又著歸潛志紀金末喪亂之事與太原元裕之壬辰雜編關西楊奐然天興近鑑東明王百一汝南遺事微有異同按楊奐然名奐有天興近鑑三卷王百一卽王鶚撰汝南遺事四卷起天興二年六月訖三年正月盧紹弓補遼金元三史藝文志未收王鶚書錢辛楣補元史藝文志雜史類並錄之

能改齋漫錄卷七曰前世學者未有不讀箋注自本朝

罷聲律而後學者不復知有箋注矣按宋人經說諸書大抵皆近當時論策文字可知其廢箋注之故正爲與當時科舉之學相反故耳新唐書力詆啖助要是景文之特識

呂氏春秋知分篇崔杼不說直兵造曾句兵鉤頸謂晏子曰子變子言則齊國吾與子共之子不變子言則今是已高注云已竟也言今竟子按今是已者今指直兵句兵而言謂此卽是也其致之死意在言外矣注解已爲竟全失語妙下文晏子曰嬰且可以回而求福乎子惟之矣其意謂吾必不同子惟所欲爲也子惟之矣語

未盡而意已足古人文章之妙也注解惟爲宜畢秋帆校本引梁仲子云當訓爲思並非

經典中載言亦有不載全文者如論語子見南子子路

不悅夫子矢之曰予所不者天厭之天厭之凡言所不

者皆盟誓之詞

左傳所載如所不與舅氏所不與崔慶之類皆是

所不之下當

有言句或言同於子路或言守道不變

王進士崧說緯言欲正名亦可

備一說但仍讀不爲否非是

皆不可知要之記者於當時有所隱諱

則不記也

大約子見南子當在出公輒時王進士之說是子路生平勇於退而難於進故問乘桴浮

海則喜於子見南子及將往公山則不悅也

又案記者曰矢之之字卽指子路

如顏淵死子哭之之字卽指顏淵是也

則天厭二語卽盟子路之辭記者不詳晰書之從可知也

校古書必求其通亦是一病如呂氏春秋簡選篇曰王子慶忌陳年猶欲劍之利也高注云陳年齊人此漢人猶知之而今日不復可知者也畢秋帆校本引梁仲子云陳年卽吳越春秋之善射者陳音善射者楚人也古年音聲相近無論呂覽但言欲劍利而必以善射當之高言齊人而必以楚人當之已非事實且古年音之聲亦何嘗相近乎凡國朝人言聲近者往往而誤高郵王氏猶不免余未暇一一指摘也

以 皇朝通志諡略核對近時內閣所刊之諡法其人
名官職歧出者甚多不能悉錄其諡之互異者直隸總
督朱昌祚諡法考云諡勤愍注云一作勤敏一作勤恪
均誤而通志諡略乃作勤僖雲貴總督郭璉考作恪勤
通志略作勤恪此等同異尙多惟諡法考有宗室王公
貝勒以下及承恩公侯諡各類而通志略有額駙諡一
門考乃遺之今按略所載額駙諡乾隆以前凡七人惟
福隆安班第考列大臣中其耿昭忠諡勤僖耿聚忠諡愍
諾穆圖諡僖以上康熙朝策凌諡襄色布騰巴爾珠爾諡毅
以上乾隆五人竟不見於考是其疏漏之甚者

欽天監監正南懷仁通志謚略作欽天監治理

謚法考署前鋒統領武穆篤謚襄壯注云一作吳木篤
通志謚略云前鋒參領雲騎尉贈前鋒統領吳木篤謚
襄壯臣等謹案吳木篤以隨征福建創發病故照陣亡
例予卹故得贈謚今考以贈官爲署任誤也

通志略朝鮮國王謚於李柵後接書李昀謚法考李昀
上尙有李焯一代謚僖順

本朝公主無謚康熙二年十月端獻長公主端順長公
主皆奉 特旨予謚見通志略

鄂容安謚剛烈當時以其由翰林起家擬文剛文烈進

呈 高宗國去兩文字故諡剛烈謹案此用范承謨之
故事也觀公順治壬辰進士改庶吉士授宏文院編修
及殉耿逆之難 賜諡忠貞 聖世褒忠之典固有不
拘常例者矣

宋史食貨志五太平興國四年詔鬻僞茶一斤杖一百
二十斤以上棄市雍熙二年造溫桑僞茶比犯真茶計
直十分論二分之等今茶業不精多方攪雜坐是出洋
之貨日減商耗民貧是宜復申僞茶之禁者也

宋史藝文志雜藝術類有李煜妻周氏繫蒙小葉子格
一卷偏金葉子格一卷小葉子例一卷是小周后尙有

遺著流傳宋時此賦南唐宮詞所當選材者也

宋志總集類有臨賀郡志二卷此後人脩地志別輯文徵之始

宋人稱左諫議大夫爲東坡

見王壺野史卷十

不知蘇長公自

號何以不避此義又明道爲宋年號而大程子門人乃

稱其師爲明道先生亦所不解也

此條記辛楣先生曾論之

易繫辭下傳過此以往未之或知也朱子本義云下學之事盡力於精義利用而交養互發之機自不能已自是以上則亦無所用其力矣案經義恐人人欲窮神知化故言未之或知注解爲無所用力似非經義

邵康節說易多雜數學殆漢人六日七分及爻辰之類不可謂之明易也朱子原象贊云遭秦弗燼及宋而明邵傳義畫程演周經其推許亦太過矣

林壽圖啓東錄晉文帝二十七年百濟表求易林及占式梁武帝大同中嘗請給毛詩博士與涅槃等經義余案陳書儒林傳陸翊少習崔靈恩三禮義宗梁世百濟國表求講禮博士詔令詔行還除給事中是百濟於大同中不獨求毛詩博士也林氏失載

梁書王僧孺傳年五歲讀孝經問授者此書所載述曰論忠孝二事此以孝經爲兼論忠孝有合於論語篇首

載有子之言實孝經之大義也後世僞撰忠經者烏足以知此

春秋繁露五行對釋孝經天之經地之義其言闕深奧博實聖門相傳之大義所謂下事上如地事天又曰忠臣之義孝子之行取之士士者五行最貴者也此告王僧孺者所以言孝經兼論忠孝也

宋季三朝政要淳祐九年記云臺綱不振時嬖寵干政彈文及其私黨則內降聖旨宣諭刪去謂之節貼臺諫不敢與爭案後世查辦大臣於彈文亦每有節去者蓋用此例

四庫全書小學類提要謂顏師古匡謬正俗拘於習俗不知音有古今其注漢書動以合聲爲言遂與沈重之音毛詩同開後來叶音之說案經典釋文關雎樂之釋文云音樂或云協韻宜五教反王姬之車釋文云之車協韻尺奢反後漢書孝靈帝紀贊以衛韻擊缺李賢注云衛協韻音於別反凡此等者甚多甚言協韻卽叶音也蓋顏籀之前已有是說矣

易坤六五黃裳元吉程傳云陰者臣道也婦道也臣居尊位羿莽是也猶可言也婦居尊位女媧氏武氏是也非常之變不可言也宋人或以爲譏宣仁或又爲之辯

其實大賢立言微顯志晦不必一一以恆情推測也余案後漢書皇后紀順烈梁皇后選入掖庭太史筮得坤之比李賢注曰易坤卦六五爻變而之比九五象曰顯比之吉位正中也其後梁后爲皇太后立桓帝誅李固溺宦官任諸梁兄弟後漢之亡實基於此程子作傳蓋採此事而深垂世戒未知各家推明傳義者曾論及此否

同治間續纂江甯府志人物寓賢傳中稱包慎伯善扁書開近人北魏一派道光中名滿江淮然不如張翰風女褶英遠甚褶英爲吳廷珍農部內曾見其徑五寸楷

書朴茂蒼老卓然元魏名筆也此志爲汪梅村總纂

此卷

則上元朱桂模所分纂

則梅村之言如是也包慎伯論書推鄧石

如篆書爲過於李陽冰而陳蘭甫師云鄧篆橫不敢橫

直不敢直其筆力雄健尙不如錢衍石先生子婦李氏

新陽人偶忘其名

因出李所篆聯以示門人又張所書聯余亦

曾見之誠奧折可喜鄧包皆海內書學大師而兩先生

又篤學儒者所言如是余於書學入之不深未敢遽爲

論斷也

唐徐靈府天台山記記王羲之入山學葉先生過筆法

事出附會然其言曰莫誇端正但取堅端筋力若成自

然端正恰有可取疑唐以前書家相傳之舊說也

杜臺卿玉燭寶典注中兩引埤雅黎氏刻本皆去其土旁但作卑余謂此不必改也此書書錄解題尙有之則流傳日本自意中事又敘述淵雅援引賅博非後人所能僞撰其注中稱今案及今世云云者正當是南宋時人附入與林億等校素問所稱新校正者同非隋人著書之例也宜其引及陸農師書耳

宋唐子西論文云魏文帝卽位求孔融之文以爲不減班揚晉武帝踐阼詔定諸葛亮故事而比之周詰融旣魏武之讎恨而亮亦晉宣之仇敵二人之言宜非當時

所欲聞而並見收錄惟恐其墜失蕩然無忌猶有先王
大公至正之道焉吾所以特有取於魏晉也見宋王正
德餘師錄
卷三此蓋有感於宋時禁三蘇文集之類而發然其言則
萬世之公論也

今士大夫仕宦之家往往不及立廟又遠仕他方故祭
祀之禮多於廳事行之案太平御覽一百八十五引盧
諶祭法云凡祭法有廟者置之於座未遑立廟祭於廳
事可也知此制晉時已然矣又御覽七百三引祭法云
香鑪四時祠坐側皆置也此制亦至今行之特別設一
案當神座前不置坐側耳

宋于廷過庭錄卷一以乾之六爻明禪讓之法坤之六
爻明征誅之法近人以爲非常可喜之義其實程子易
傳已有此義特未及于廷言之暢耳于廷曰初之潛龍
舜之居深山也九二坤五來降釐降媯汭當此爻矣歷
試諸難其當九三乎四之或躍其攝天子乎案程傳曰
初九聖人側微舜起側微見尚書序若龍之潛九二舜之田漁時
也利見大德之君以行其道九三舜之立德升聞時也
君德已著天下將歸之其危懼可知九四舜之歷試時
也以宋說證程傳不過略先一爻耳無大異也其言乾元用九
之義坤之六爻程子雖不以文王與紂當之然六五傳
亦同

云或疑在革湯武之事猶盡言之獨於此不言則其大旨亦與于廷之意合今人言經學不欲稱述宋人然程朱命世大儒其言理亦何所不包也

晉庾仲初虞舜像贊云飛龍在天陽

德文明亦宋說之所本

臧鏞堂韓詩訂譌云直齋書錄解題云廣川詩故四十卷董道撰其說兼取三家不專毛鄭謂魯詩但見取於諸書其言莫究齊詩尙存可據云云案陳振孫所駁甚是呂東萊讀詩記所載董氏卽斯人也其言皆依託僞撰余案朱子文集答呂伯恭書云卷三董氏詩建陽有板本旦夕託人尋訪納去其間考證極博但不見所出

使人未敢安耳此朱子讀書精審勝呂東萊處鋪堂未引亦疏

法苑珠林卷五十四引莊子曰人而不學謂之視肉學而不行謂之曰撮囊今本無此語當出莊子逸篇困學紀聞亦未載

釋贊甯高僧傳卷七釋義寂傳云乃天台山研尋止觀智者教迹遠則安史兵殘近則會昌焚毀寂思鳩集適金華古藏中得淨名疏而已後款告韶禪師囑人泛舟於日本國購獲僅足今刻全藏亦多資日本來書可謂後先同揆正不獨皇侃論語疏及文館詞林諸書爲儒

流之珍裘已也

李義山詩三十三天常雨華注家未明三十三天之義
案隋智者大師維摩經疏云昔迦葉佛滅後有一女人
發心修塔復有三十二人發心助修修塔功德爲忉利
天王其助修者而作輔臣君臣合之名三十三天

姚秦竺法念譯菩薩瓔珞本業經云釋迦牟尼佛告敬
首菩薩言佛子所謂流伽度秦言發心住流諦伽度秦
言治地住以下十數條
文多不錄云云秦言者皆譯人解說而託
於佛言此殆如後世時文代入口氣之類疑天竺文體
本有如是者此佛經之所以增多也

徐騎省集御製春雪詩序注錄御批云宿來健否酒醒詩畢可有餘力何妨一爲之序以紀歲月呵呵重光自是詞人出筆便有風致然非柏梁銅雀之高華已

文選謝惠連七月七日夜詠牛女詩注引曹植九詠注二條是陳思王集有舊注也

抱朴子廣譬篇云縣布可以禦寒不必貂狐是晉時已有縣布又房子出縣見曹操夫人與楊彪夫人書及魏都賦

純常子枝語卷八

純常子枝語卷九

萍鄉文廷式撰

王充論衡難歲篇儒者論天下九州東西南北盡地廣
長五千里竟三河土中鄒衍論之以爲九州之內五千
里竟合爲一州在東東位名曰赤縣州自有九州者九
焉九九八十一凡八十一州又云如鄒衍之論則天下
九州在東南位不直子午余按鄒衍知中國之徧東必
以天算測之阮文達以天屈西北爲无爲專指中國言
亦此義也鄒衍能談至道而絀公孫龍見史記平原君傳豈憑
虛臆說者哉

記日之例唐以前於初旬皆不加初字錢辛楣先生說也然稱初一初二者亦復甚古漢古詩爲焦仲卿妻作云初七及下九又涅槃經爲晉宋間譯本屢稱初十五韋蘇州九日詩云初九未成旬是漢晉以來並有此稱特著之記事之文則自宋人始耳

北宋張奕墓志云卜十月初三日甲

申葬于景雲鄉紹興丁丑秦果序刊續世說題三月初一日

法苑珠林每月十齋日

有初一日初八日

閱古文尙書疏證附錄各條閻百詩性情蓋近佻薄阮文達刊皇清經解不收此書別裁之卓識也

嚴脩能蕙楊雜記云閻氏糾駁前人遇有閒隙輒肆詆

誤如曲肱而枕之枕字釋文音之鳩反黃陶菴先生文讀作如字誠誤然非大繆也閻著四書釋地於三續中兩存其說糾繆可也奚必兩見乎且云讀黃瀋耀文輒笑其不識字呼先哲之名而加以惡聲難乎與言謹厚矣其悔菴學文書潛邱劄記後一篇論亦相近

文達刊 皇清經解略有刊改及編卷之法皆用 四庫全書之例然文達旋調滇督開板之事多爲嚴杰主持故去取恆有未當校勘亦多譌繆

闕沈梅村寒夜叢談知嘉慶間風俗奢於乾隆至道光中葉而天下華侈極矣道府之署日演優伶負販之妻

並盈珠翠粵寇之亂蕩滌幾盡今則物力彫耗強鄰迫伺而民無悛心徒飾外以虛內不知示儉示禮將何所施也論者以爲西人治國以奢爲主奢則物力豐盈貨貝流通是亦一說然豈所語於今日之中國哉

國朝抑制宦寺之法漢唐宋明所不及也士大夫亦頗知法度不甚與之往來乃近日則有監司侍從出於其途者矣悲憤何極博士有正先或未必重秦人之患也西華門內咸安宮後沿御溝之西多宦寺所居其閒娼賭皆備查禁城之大臣知之而莫敢誰何也志伯愚侍郎值文職六班時親見此事爲余言之

元典故編年攷記奎章閣官制云搆制象齒小牌五十
上書奎章閣三字一面篆字一面蒙古字與畏吾兒字
分散各官懸佩出入宮門無禁按元時碑文亦多用三
體書其蒙古新字以今時蒙古文讀之亦不甚可通
水經河水注云紫微有鈎陳之宿主鬪訟兵陳故遁甲
攻取之法以所攻神與鈎陳并氣下制所臨之辰則決
禽敵

弘明集卷十一齊蕭子良與孔中丞書孟子有云君王
無好智君王無好勇勇智之過生乎患禍所遵正當仁
義爲本按此雖約孟子書而孟子實未言好智之過疑

出孟子外書又卷十梁武帝敕答臣下神滅論云孟軻有云人之所知不如人之所不知今孟子書亦無此語晉書閻續傳續上書理太子之冤曰孟軻有云孤臣孽子其操心也危慮患也深故多善功按故多善功句與今本孟子文異

蒙古遊牧記鄂爾多斯部注云道光二十五年榆林府知府徐松檄懷遠縣知縣何丙勳查統萬城故址丙勳於是攜南鍼紙筆隨步定向從圍水西渡出邊牆又西渡磨姑河又西渡黑水河又西渡無定河地勢迤而高曼陀二里許至舊相傳之白土城細加相度在懷遠城

正西九十七里黑水河在無定河東距縣城五十里與所謂城在黑水之南者不合惟去白土城北五十里有淖泥河東入無定河之下流疑淖泥河爲古黑水其地有土城周圍三重俱用土築云云星伯精於地理然不信禹貢雍梁黑水爲一而必欲於雍州境求古黑水亦失之太泥矣

蒙古遊牧記車臣汗部注云元史太宗紀諸王百官大會於怯綠連河曲雕阿闌之地祕史云於客魯連河闊迭兀阿喇勒地行大聚會案今官行譯改元史誤以曲字屬下讀故改曲雕阿闌曰齊達勒敖拉今案親征錄

之怯綠連河卽祕史之客魯連河而祕史闊迭兀三字
必非親征錄之曲雕二字其應以河曲斷句甚明余謂
曲雕二字正闊迭兀急讀之音元史亦作庫鐵烏蓋庫
曲闊本一音之轉而迭兀鐵烏急呼則爲雕音耳張氏
於曲字斷句誤甚特齊達勒之改譯與闊迭兀之音亦
未能吻合也

又土謝圖汗部注必以元魏爲俄羅斯人不知俄羅斯
之西伯利部自明始有之不能推之數百年以前也俞
理初謂烏洛侯侯字必非俟譌自是有識勝張氏遠矣
全唐文八百九十九邱光庭論渾蓋軒宣諸家得失云間宣

夜之說其理如何曰亦非也易曰天行健既稱行健則有形矣道經云天無以清將恐裂又史書每稱天開天裂天若無形將何開裂宣夜言天無形質繆矣按宣夜家說久佚不知光庭何自得之然所謂天無形質其理實高於渾蓋光庭所駁則秦宓天有頭耳之類也

思辨錄不信沈括夢溪筆談月光借日之說是陸桴亭學識不及朱子處惟周髀四游之說朱子屢述之而不悟其非李文貞榕村語錄正之

易林比之萃曰團團白日爲月所食春秋隱三年公羊傳何邵公注曰不言月食者其形不可得而見也故疑

言日有食之是漢人已知日食由於月掩王萊友肌說云近人有言古人不能推日月食據此二說月之食日固不可見而何自言之是必由推算矣余案印度以日月食爲羅喉計都又多言修羅手障日月而中國載籍能明言月借日光又深知日爲月蝕則天文之學東勝於西舊矣謂疇人子弟分散傳之西方者非盡誣之論也

唐宰輔謚文獻者劉仁軌劉幽求姚元崇

按碑作文貞

裴耀

卿張九齡見徐復鄭珣瑜謚議

國朝二百五十年來

宰臣例謚文猶未有以獻爲兼字者

唐會要卷八十八文獻贈司徒申國公

高士廉贈并州大都督樂城縣公劉仁軌贈太子少保
梁國公姚崇贈太尉博陵王崔元暉禮部尚書徐國公
劉幽求贈司空趙城縣公裴耀卿贈荊州大都督始興
縣公張九齡贈司徒贊皇縣子李栖筠贈尚書右僕射
鄭珣瑜徐復議末即平頭之憲自世宗尊諡後亦不
引高崔未詳其故
容撰擬矣

唐會要卷七十六大中十二年中書舍人李藩知舉放
博學宏詞科陳琬等三人及進詩賦論等召謂藩曰所
賦詩中重用字何如藩曰錢起湘靈鼓瑟詩有重用字
乃是庶幾上曰此詩似不及起遂落下今制試帖詩不
許重字用唐時故事也

英煦齋協揆恩福堂筆記云乾隆癸丑會試中式一百

二名覆試磨勘罰科者二十九名按太學題名記是科
未經殿試姓名詳載自曹德華至王東林適二十九人
殆卽因覆試磨勘罰科者蓋當時留殿試者甚稀今則
每科必至四五十人殆不可解又是科未殿試之韓文
綺乙卯列二甲第六名是罰科後補殿試仍入前十本
與近制異

明史袁崇煥傳崇煥以歸鄉勸毛文龍文龍曰向有此
意但惟我知東事東事畢朝鮮衰弱可襲而有也余謂
明人欲備東方必以得朝鮮爲第一義文龍之才蓋不
在臺灣二鄭之下

袁督師事蹟載其過訶林寺口占云四十年來過半身
望中祇樹隔紅塵如今著足空王地多了從前學殺人
不得已而用兵上以衛國下以救民乃仁術也督師以
爲學殺人其立心稍誤矣

朱竹垞撰錢龍錫傳

曝書亭集卷六十四

龍錫訊崇煥方略曰不

外東江關甯兩路進兵耳東江者島帥毛文龍也曰舍
關寧實地而問海道何也崇煥曰譬奕然局有四子東
江其一也可則用之不可則有以處之然則崇煥殺文
龍後意在經營雙島使大清兵不深入崇煥必由海
道以襲遼矣

李約農侍郎云袁督師之所以勝 大清者特善用火礮也是時粵東已與西洋互市督師蓋必購槍礮於荷蘭等國矣余按明末陸之瀚陸子韞言卷五云敵之奔突其勢在馬而又巧于發矢我之所恃以擊敵者莫神于火銃其著書之時適當崇煥督師之時則侍郎之言爲有徵也

宋敏求長安志卷十安定坊東北隅五通觀隋開皇八年爲道士焦子順所立子順能驅役鬼神傳諸符籙預告隋文膺命之應及卽位拜爲開府永安公立觀以五通爲名旌其神術按明以來江南有五通之廟疑沿此

名而誤別祀妖神與隋文之崇術士亦適類矣

五通字釋典多

有之與道家義異

又輿地紀勝宋時鄱陽有五通廟

佛經偈字多不得其解後魏般若流支譯正法念處經卷十五自注云偈者正音云伽他單舉伽字訛言爲偈魏言頌是譯義當爲頌字

明楊升庵經說卷七云公羊傳葵邱之會叛者九國謂叛者多耳非實有九國也宋儒趙鵬飛云葵邱之會惟六國會鹹牡邱皆七國會淮八國甯有九國乎公羊本意謂一震矜而九國叛猶漢記云叛者九起云爾趙氏如數求之真癡人說夢也古人言數之多止於九逸周

書云左儒九諫於王孫武子善攻者動於九天之上善
守者伏於九地之下此豈實數邪楚辭九歌乃十一篇
九辯亦十篇宋人不曉古人虛用九字之義強合九辯
二章爲一章以協九數亦大可笑接近人汪容甫述學
中有釋三九二篇深通古書義例據此則升庵已見及
之

宋李心傳朝野雜記卷十三云舊例朝廷試舉人至暮
者許賜燭然殿深易黑日昃殿上賜燭出矣慶元五年
上初策士江西正奏名進士黃實嚴州特奏名進士皇
甫鑑納卷最後廉州特奏名進士劉嘉猷賜燭至一更

四點御藥院言賜燭故事正奏名降一甲如在五甲降
充本甲末特奏名降一等如在五甲與攝助教詔如故
事按 本朝殿廷考試例不給燭然同治以來及光緒
初年法制漸寬久居京師人情洽熟者 殿試寫卷未
完往往攜至內閣凡攜出者先寫末頁數
行乞收卷者一併便得寫至次晨始
畢至丙戌後較嚴癸巳考試試差有燃燭完卷者四人
御史陳奏 上意頗不悅 諭嚴禁此實足以肅廷試
之制勝於宋制之僅降一等者多矣

王夫之識小錄明時翰林稱前輩爲老先生今制前輩
稱後輩爲老先生其誤不知始於何時

張平子思玄賦夕惕若厲以省愆兮厲字疑誤衍

南海孔廣陶北堂書鈔校本實林揚伯庶常代撰揚伯名國賡番禺人以甲午庶吉士散館改吏部主事余幼時讀書會之友也丁酉夏卒其平生熟精儀禮未知撰述有成否其弟名國贊字明仲己丑進士授某部主事次年卒通史學撰三國地理志注其已刊者有讀三國裴注述一卷未盡所長二人少極貧其能成學者陳東塾師實周濟教誨之惜俱不永年嶺學近頗寥落矣說文無笏字士喪禮竹笏鄭注曰今文笏作忽又按說文云矧籀作矧一曰佩也象形穆天子傳拔帶矧郭

璞曰留長三尺杼上椎頭一名珽亦謂之大圭從曰勿聲又鄧注尙書云留者臣見君所秉書思對命者也陸清獻謂朝覲不執笏爲失臣禮余按馮道使虜虜以道有重名賜牙笏道以詩謝云牛頭偏得恃象笏更容持是餘使見遼主多有不得持笏者晉書輿服志云手版卽古笏尙書令僕射尙書手版頭有白筆以紫皮裹之名曰笏

光緒二十年六月二十六日 上諭徐用儀補授軍機大臣軍機大臣言補授前此所未有也又是月 命戶部尙書翁同龢禮部尙書李鴻藻會議倭韓事覆奏時

兩尙書列銜親王大學士前亦前此所未有也聞摺奏
仍係軍機處主稿繕摺後兩尙書皆未見云

以電奏歸總理各國事務衙門代奏而總署之權過於
明之通政使矣通政使之權止於壓閣一二日而總署
則竟可不奏也以兵事歸總理衙門電寄而總署之權
過於明之本兵矣明之本兵不過制各軍之進退而總
署之權則兼其礮之放否船之行否而亦制之且能與
聞其餉事也而且總署之用財非戶部所能知兼海軍總
署之保案非吏部所能核案職分而敗國家究亦未得
一真通交涉之才爲可歎也

余甲午有一疏請明
職分卽指總署而言

烏臺詩案王詵又送弓一張箭十隻包指十箇與軾包指卽今班指蓋聲之轉

廣弘明集卷二十梁湘東繹簡文帝法寶聯璧序東施雜賦日本校本云隨同作馳案當作曉

又云大秦之籍非符八體康居之篆有異六文蓋當時二國之書有流傳中土者康居之篆疑其文字詰屈有類篆書

漢書五行志中之下道人始去服虔曰有道之人去按道人二字始此

唐林懷思仲蒙子書誤篇立署于河側用樵商賈之利

立署至不仁云慎思咸通間人立署河側以權商利已似近日釐卡之政

宋書顏延之庭詰云夫和之不備或應以不和猶信不足焉必有不信此讀老子信不足焉有不信已以焉字屬下讀足證成王懷祖讀書雜志之說

三洞羣仙錄引感應錄記北齊由吾道榮事由吾蓋複姓

李衍竹譜詳錄卷五仲竹爾雅云仲無筯注云亦竹類僧神珙云筯似琴有絃實未詳其說是神珙於定字母之外別有小學類書

文選王元長曲水詩序注引孫子兵法曰其鎮如岳其
渟如淵又曰人效死而上能用之雖優游暇譽令猶行
也今本孫子皆無此文李崇賢云譽豫古字通

漢官儀

孫淵如輯本

載孝桓末侍中皇權參乘問地震云不

爲災還宮左遷議郎近世權奸乃有以附會災祥罪言

官者其識乃出漢桓帝下也

君主之世災祥乃不得已而言之後世物理之學日

精自不當復加附會然不可以此遂譏古人所謂一時權教理當如此也

困學紀聞卷六云災異古史官之職我朝舊制太史局

隸祕書凡天文失度三館皆知之每有星變館吏以片
紙錄報故得因事獻言自景定枋臣欲抹殺災異三館

遂不復知按抹煞災異古今所同惟 本朝之制凡天
變眚祥皆由欽天監封奏進書故史官無由得知光緒
間修會典館臣移文欽天監詢嘉慶以來事監臣不覆
又奏請 旨飭問惇王急責監臣不數日乃回文不及
百字略云自嘉慶十九年至光緒十五年天上並無事
故其可笑如此館中乃強依時憲術推攷日月薄蝕五
星凌犯備一門而已

近十年來未知增損若何
此特記一時之事實耳

方士淦蔗餘偶筆云同年齊梅麓

彥槐

精天文推步造

渾天儀嘗言談星命者須生人時將經緯度於皎日下
對準方驗若僅據某日某時推算毫釐有差休咎或爽

按此卽天步真源之學近時溫明叔侍郎葆琛傳其術

景東甫禮京卿言明叔爲寶文靖之師嘗爲文靖推平

生休咎無一字不驗其中有目疾數日亦先推出術數之學信有奇驗者然此事要關夙慧侍郎之門人有梅姓甘姓者傳之皆不甚驗

余所遇通數學者有蔣姓湖北人每有人問休咎但言父母存亡兄弟多寡卽可推其誕生年月日時余在京師與友人袁慰亭沈子培張巽之楊廉夫諸君歷試之皆驗然其言休咎則絕不應此小小術數猶射覆之類耳然要不可謂竟無其事

詩大雅正月篇燎之方揚甯或滅之赫赫宗周褒姒滅之滅滅字變文而義不異古人行文之體如是阮文達掣經室集論之其雙聲疊韻形容之辭似此者尤多楚辭卜居之突梯滑稽注家但解滑稽未有能解突梯者余案突滑梯稽皆疊韻字突梯卽滑稽也變文以足句耳以此推之宋玉風賦被麗披離被麗卽披離也九辯愴怳懣懣愴怳卽懣懣也司馬相如子虛賦罷池陂陲罷池卽陂陲也上林賦澤弗宓汨史記作澤潏潏汨澤與宓弗與汨皆疊韻也偏側泌澌偏側卽泌澌也谿呀谿開文選作開字谿呀卽谿開也歲磈嶮歲磈卽嶮也

柴池芘虓柴池卽芘虓也大人賦糾蓼叫蓼糾蓼卽叫
蓼也楊雄甘泉賦柴虓參差柴虓卽參差也蜀都賦崇
戎總濃崇戎卽總濃也枚乘七發沌沌渾渾狀如奔馬
混混庀庀聲如雷鼓沌沌渾渾卽庀庀混混也以及木
華海賦之灌漑濩渭左思吳都賦之颺颺颺颺悉用此
例若荀子議兵篇之隴種東籠則又見於子書者也
魏武樂府曰黃鵠摩天極高飛後宮尙得烹煮之御覽
一百一十六漢高以爲鴻鵠高飛矰繳安施而魏武則慮爲後
宮烹煮感物旣同措懷則異於此亦足知兩代開國之
規模也

文選鍾會檄蜀文注司馬法曰古者以仁爲本以義治之之謂正曹操曰古者五帝三王以來也仁者生而不名義者成而不有據此則曹操不獨注孫子兼注司馬法

文選孫子荆爲石仲容與孫皓書注李陵詩曰幸託不肖軀且當猛虎步按此二語出孔北海雜詩此注及曹子建七啟注並引作李陵當別有所本

舊唐書貞觀二十年吐番遣大臣祿東贊奉表曰奴纔聞陛下發駕少選之間已聞歸國不稱臣而稱奴蓋蕃禮也

近時上書尊者篇首皆用竊字或不得其解按莊子庚桑楚篇竊竊乎又何足以濟世哉陸德明釋文云竊竊司馬彪云細語也一云計校之貌今世所用蓋取私細計校之意兼此二意

金陵詩徵有矢之楨江甯人康熙癸酉武舉光緒丁酉搢紳有三等侍衛慙龍章河南人

唐釋靖邁古今譯經圖紀卷四居士萬元懿元是鮮卑姓万俟氏按万俟氏自稱姓萬是万卽萬字後人讀万俟爲墨其之音者誤也

李仲約侍郎作撼龍經注雅瞻極矣然未詳楊筠松之

名及其時代案理氣心印載宋吳景鸞表云唐邱延翰在玄宗朝曾撰進理氣心印經三卷天機書三卷僖宗末顧水曾求己與同關人楊益在兵間得其書後由曾文迪傳陳希夷而景鸞父克誠從希夷學陰陽卜筮故景鸞得之則筠松實名益爲唐末人無疑侍郎嘗疑龍經屠龍不如且抵豨語屠龍抵豨兩典同用或本之東坡則書當在東坡之後余謂東坡亦本之劉夢得何卜賦筠松此語實無可疑且安知東坡不卽用龍經耶

管御史世銘韞山堂詩集卷十六追紀舊事詩自注云

丁未春

按丁未乾隆五十二年

大宗伯某掎摭王漁洋朱竹垞查

他山三家詩及吳園次長短句內語疵奏請毀禁下機
廷集議時余甫內直惟請將曝書亭集壽李清七言古
詩一首事在禁前照例抽毀其漁洋秋柳七律他山宮
中草絕句及園次詞語意均無違礙當路頗韙其議奏
上報可按此事在 四庫全書總目告成之後好事者
猶妄肆吹求如此陳蘭甫師云自韞山此議後、本朝
文字之禍始輕韞山詩自言辨雪仍登天祿閣三家詩
草一家詞其實所保全者不止此四家矣

抽燬書目銷燬書目違禁書目數本雜出不同歸安姚
氏咫進齋刻入叢書順德李仲約侍郎

文田

曾爲之考

訂細批書眉已得六七侍郎歿後未知有人爲之別錄
刊行否也

管韞山論文雜言云近日北方詩人多宗蒲城屈徵君
悔翁南方詩人多宗長洲沈宗伯確士屈豪而但沈謹
而庸施朱王宋之風於茲邈矣余嘗謂自有歸愚之說
而詩家天趣興會皆索然殆盡此以庸詆之可謂助我
張目者屈悔翁集余嘗得之中亦頗有典雅之作然北
人已多不能舉其名者矣

屈復弱水詩集過貞賢里詩自注云二曲李先生顓辭
詔講學門弟子三千人所著有反身錄當事表其間曰

貞賢里歲丙寅余年十九冰雪中扶病晉謁尼止者一
邑同聲子姪孫佩玉友人劉伯容先登龍門又退有後
言竟廢然而返德修謗興古亦有之且東家某可念亦
未有甚至者後欲再訪而先生謝世蓋棺論定年少爾
莽存此識悔余曾校二曲集未知其被謗者何事也據
詩則悔翁生於康熙七年乾隆丙辰舉詞科年六十九矣

萬立唐南北合參云老子之道文始派最高

即關尹子

少陽

派最大

道家所謂東華帝君姓王名誡字元甫

少陽傳正陽

即漢鍾離雲房

正陽

傳純陽純陽首傳王重陽重陽傳邱長春開北派純陽
又傳劉海蟾海蟾傳張紫陽開南派又尹文始一派文

始傳麻衣

即李名和

麻衣傳陳希夷希夷傳火龍真人火龍

傳張三丰文始派中麻衣傳希夷少陽派中海蟾亦以丹法傳希夷兩派於斯一匯故以三丰爲文始派可謂爲少陽派亦可純陽又傳陸潛虛開東派李涵虛開西派皆陰陽二品大丹也並統於南宗

神仙家學亦分南北二宗明王禕青巖叢錄云鍊養服食全真之教兼而用之全真之名昉於金世有南北二宗之分南宗先性北宗先命今則北宗爲清淨自修之學南宗乃陰陽互交以氣而不以形與王忠文所言互異陳文述西泠仙詠自敘云伯陽闡化爲道祖純陽承

凝陽正陽之緒爲道宗純陽再傳宗分南北北則王祖
重陽重陽傳邱處機長春劉處玄長生譚長真馬鈺丹
陽郝大通太古王處一玉陽孫不二清淨爲北宗七真
下而王栖霞尹清和宋披雲徐復陽承之南則劉操海
蟾傳張伯端紫陽張傳石泰杏林石傳薛道光又名道
淵薛傳陳泥丸按惠州府志陳泥丸卽陳楠博羅人言其得太乙刀圭金丹法於毘陵神師得
景霄大雷琅書陳傳白玉蟾爲南宗五祖下而彭耜鶴
於黎姥山神人林蕭紫霞承之皆傳仙佛合一之道按修煉家自謂命
功謂釋家爲性功世遂有仙佛正宗等書至近世所傳
仙術又多言始自達摩矣

按元人金蓮正宗記王重陽名中孚字久卿咸陽人入道後更名嘉字知明馬丹陽名從義字宜甫寧海人譚長真名玉字伯玉寧海人劉長生掖城人邱長春卽邱處機已見史傳王玉陽名處一東牟人郝太古名璘號恬然子亦寧海人孫清淨者孫忠翊之幼女馬丹陽之妻亦寧海人後改法名曰不二道號曰清淨散人此陳氏所述然金蓮正宗所記尙有和王蟾李靈陽與王重陽並稱三祖陳氏固未數也

梁僧祐弘明集卷八釋玄光辨惑論合氣釋罪三逆一條云乃開命門抱真人嬰兒迴戲龍虎作如此之勢用

消災散禍其可然乎漢時儀君行此爲道後至孫恩佚蕩滋甚士女溷漫不異禽獸此則合氣之說由來已久然藉以滅罪又有呪言則非參同契之學故玄光舉儀君而不及伯陽也顧今世言神仙者乃多以釋達摩爲初祖卽言合氣者亦宗之殆不可解

黃庭內景經二十二章云三五合炁九九節可用隱地回入術此合氣二字所本入藥鏡等書雖依託而實合氣之正傳也

馮班鈍吟雜錄卷一云道家有雷門忠孝一派其說曰精炁者身之本也不愛精炁者爲不孝心者身之君也

不敬其心者爲不忠余按此派又在南北全真三派之外江上清琅嬛瑣記云出庚之後接雷門列曜排算每候差早二時止五十八箇時辰爲一候自震庚自巽辛己早六時然則雷門者取出震之意固參同契之支流歟

參同契世傳彭曉注然多不詳其人宋正一道士陳葆光三洞羣仙錄引野人閑話云祠部員外郎彭曉字秀川自號真一子常謂人曰我錢鏐之後世有得道者余雖披朱紫食祿利未嘗懈怠於修鍊去作一代之高人終不爲下鬼矣宰金堂縣則恆騎一白牛於昌利山往

來似有會真之所往往有白鶴飛鳴前後曉注陰符經
解參同契每篆符謂之鐵扇子有疾者餌之則愈是其
事實也

遼人箸述傳於世者龍龕手鑑三命消息之外世不多

見友人楊仁山

文會

勤求釋典於日本得藏外之書有

遼僧法悟釋摩訶衍論贊玄疏五冊遼僧志福釋摩訶
衍論通玄抄五冊法悟書首有耶律孝傑進書表一篇
繆筱山編修方輯遼文存余屬其速采入錄仁山云二
書皆深於象教當募刊流布也日本存中國唐以前書
釋家醫家尤多窺基一行道宣之書凡十餘種余皆見

之惟僧肇金剛經注不類姚秦時語與肇論及維摩經
注詞意皆殊檢大唐內典錄及高僧傳並不載蓋僞書
也

西人稱中國爲支那

各國音皆略異然實本印度
文故仍作支那或作脂那翻譯

名義集云一曰支那讚美此方衣冠文物二曰指難此
云邊鄙要之皆後起義也於字音當爲秦字之轉余前
卷已言之近人亦頗有同余說者又按翻譯名義集云
震旦或曰眞丹樓炭經云葱河以東名爲震旦以日初
出耀於東隅故余謂震旦與支那亦一聲之轉謂日出
東隅者實附會震旦字義觀樓炭經指葱河以東言之

則明以地言亦秦音之轉耳唐李長者華嚴經論卷二
十六云震旦國亦曰支提那此云思惟以其國人多所
思慮以立其名卽是今漢國也按強立國名必無之理
惟云支提那者蓋提那二字皆是餘音猶臘丁之亦稱
臘底諾矣歷代三寶記曰五天目東國總言脂那或云
眞丹或作震旦此蓋取聲有楚夏耳翻譯名
義集云或作麻丹唐釋道宣釋迦方志卷上云雪山以東至於
東海名人主地唯和暢俗行仁義安土重遷是至那國
卽古所謂振旦國也豈稱中國爲振旦爲至那亦印度
古今語耶振旦卽震旦至那卽支那唐釋智昇續古今
譯經圖紀曰印度國俗呼廣府爲支那名帝京爲摩訶

支那余按摩訶大也翻譯名義集以摩訶支那譯大唐
不如智昇之塙開元釋教錄卷七云大支那國舊名真
丹振旦者並非正音無義可譯惟知是此神州之總名
也旣云無義可譯則其爲秦字之轉音名從主人益可
信矣古教彙參預言徵實一條以秦指中國或有所受
之也

余旣引肇論以嵐字古訓爲風又案文選謝靈運晚出
西射堂詩夕曛嵐氣陰李善注云夏侯湛山路吟曰道
逶迤兮嵐氣清埤蒼曰嵐山風也嵐緣舍切則嵐字當
从山風會意風亦聲魏晉間俗字佛書亦以毗嵐爲猛

風

文選謝康樂擬魏太子鄴中集詩稱劉楨爲卓犖偏人
李崇賢注引潘勗立達賦曰匪偏人之自題訴諸衷於
來哲是偏人又勗所自稱蓋偏與奇意近偏人卽莊子
之畸人矣

漢饒歌遠如期曲處天左則大樂語意甚奇蓋處天左
側則天在其右矣大易所謂自天右之吉無不利也陳
祚明以爲自黃帝升天語來固爲失之莊述祖引詩在
帝左右作證則郊祀之詞與下文增壽萬年詞意亦不
相屬也管子戒篇云期而遠者莫如年以重任行畏塗

至遠期唯君子乃能此遠如期題之所本

李義山詩玉桃偷得憐方朔吳禮部詩話謂方朔改臣朔乃佳余按海內十洲記曰方朔云臣學仙者耳十洲記雖依託而流傳已久義山故用之且魏晉六朝文字雙名單稱者不可悉數養新錄曾略記一二吳氏蓋未知此義

錢辛楣養新錄卷十六七言在五言之前一條云楚詞招魂大招多四言去些只助語合兩句讀之卽成七言荀子成相荆軻送別其七言之始乎至漢而大風瓠子見於帝製柏梁聯句一時稱盛而五言靡載於班史者

唯邪徑敗良田童謠出於成帝之世耳劉彥和謂西京
詞人遺翰莫見五言所以李陵班婕妤見疑於後代又
謂古詩佳麗或稱枚叔則彥和亦未敢質言也要之此
體之興必不在景武之世虞姬歌不見於史漢諒亦出
於依託余按五言後於七言此論致確惟七言之始荀
荆兩作體尙未成文選江淹恨賦注云董仲舒集七言
琴歌二首其正名七言者當以董生爲稱首歟

史記儒林傳斌斌多文學之士斌斌蓋彬彬之誤三國
志魏明帝時公卿奏云於文文武爲斌是斌爲會意字
史記淮南衡山列傳江都人救赫索隱云劉向別錄易

家有救氏注余案漢書藝文志易十三篇無救氏注是
蓋堅於劉錄多所刪削也

晉人好名斌廢帝紀有汝南內史朱斌宗室傳西河繆
王斌石季龍載記季龍子斌石勒載記晉兗州刺史檀
斌冀州刺史王斌高僧傳卷六有釋慧斌

史記天官書其人逢悟化言索隱云逢悟謂相逢而驚
也亦作迕化當爲訛字之誤余案化與訛古今字尙書
平秩南訛一作南化是其證逢悟卽蠡午之異文索隱
說誤集解悟迎也亦非

滿洲源流攷卷十八云北盟錄女真言語薩滿

滿洲語
師巫也

舊作珊蠻
今改正

者女巫嫗也按薩滿珊蠻皆蘇幕之轉音文

獻通考卷三百三十六云高昌婦人戴油帽謂之蘇幕遮蓋因幕遮二字附會似誤

五代釋可洪藏經音義隨函錄序云如喇喀哩嚟嚟吒嚟叭啞咤咄嚟論嚟哩自注已上諸字並彈舌呼尤足證唐以前譯語凡特加口旁者皆誌彈舌音也

東坡詩已輸巖蜜十分甜或釋巖蜜爲櫻桃此附會之說耳東晉佛陀跋陀譯大方等如來藏經云譬如淳蜜在巖樹中無復羣蜂圍繞守護此巖蜜二字之所本釋名釋首飾篇云穿耳施珠曰瑠此本出蠻夷所爲中

國入效之耳白香山新樂府時世妝云元和妝梳君記
取髻椎而赭非華風然則中國婦女之飾染於戎狄者
亦多不獨男子胡服騎射而已

自來史家記南北朝事或以魏繼晉或以隋繼陳正統
之說紛然錯出自司馬溫公通鑑既作而尊南朝者始
無異辭然隋時又有一說與前二說並異者費長房歷
代三寶記卷三云魏晉已來梁孝元帝繹承聖四年乙
亥都在江陵爲西魏滅自是南朝歷數北旋其年卽魏
後元二年蕭衍孫察魏賜嗣立紹繼梁基是曰後梁旣
爲附庸則是影國此以隋承周周承西魏西魏承梁長

房建武軍有此論然不沒晉朱實爲至公錄存其言亦
是備史家之一得也

釋名釋衣服篇韡跨也兩足各以一跨騎也本胡服趙
武靈王服之

崔豹古今注貂蟬胡服也貂取其外柔易而內剛勁蟬
取其清虛自牧識時而動

崔豹古今注李石續博物志卷五引孟詵說並云酒杯藤

出西域藤大如臂花堅可以酌酒國人寶之不傳中土
張騫使大宛得之出張騫出關志緇門寶訓錄雲法師
務學十門云李後主得畫牛一軸畫出欄外夜歸欄中

持貢闕下太宗示羣臣無知者僧錄贊寧曰南倭海水
或減則灘磧微露倭人拾方諸蚌脂中有餘淚數滴者
得之和色著物則晝隱夜顯沃焦山時或風燒飄擊忽
有石落海岸得之滴子摩色染物則晝顯夜晦見張騫
海外異記後杜鎬檢三館書目果見於六朝舊本書中
按張騫書漢藝文志不載此等自是六朝人增會然如
逆異記金樓子之類亦瑰異皆可觀

牟子理惑論云昔孝明皇帝夢見神人身有日光飛在
殿前於是遣使者張騫羽林郎中秦景博士弟子王遵
等十二人於大月支寫佛經四十二章是後漢時亦有

張寯且奉使至天竺矣然他書多稱景遵少及張寯或由牟子誤記也藝文類聚等書引張寯出關記當是此人俟攷

唐釋法琳上秦王啟引陶隱居年紀齊秘書楊价史目數條二書隋經籍志失載

趙毅北地新平人隋祕書郎司隸刺史撰文帝起居注二十五卷大業略記三卷並藏祕閣見唐釋道宣集古今佛道論衡卷丁

續集古今佛道論衡元魏正光二年七月明帝加元服設齋勅法師與道士論議姜斌曰孔子既是制法聖人

當時於佛何得一無言記曇謨對曰眞是仁者不識覽
不弘廣何得輒謗孔子於佛無一言仁者若不相信孔
子自有三備卜經佛之出世在中備仁者善自披究足
得聞曉案三備卜經未知何書周易辨終備或作中備
疑是曇謨所指然今之所傳殊無佛出之語豈有脫佚
或非此書耶此與孔子衝波傳等同爲委巷流傳不足
據爲典要耳

宋陳葆光三洞羣仙錄引王氏神仙傳云王纂當晉室
擾攘之時憫斯民之苦每夜飛章以告上帝俄感太上
自空而下告之曰子憫生民形於章奏吾得鑒聽於子

遂命侍童取三五齋訣授纂曰勉而行之眞仙可冀
李衍竹譜詳錄卷五引顧夷義訓有葛竹箴竹

純常子枝語卷九